



ENCIK BUANG



ENCIK BUDIN



ENCIK SUIB

# Silat kini diubahsuai 20 JAN 1984 menjadi olah raga

## PENCAK - SILAT

DALAM tahun-tahun 40-an, kebanyakan orang belajar seni silat sebagai salah satu langkah mempertahankan diri.

Tetapi, dalam zaman yang aman sekarang ini seni silat telah diubahsuai dan bertukar corak menjadi sejenis kegiatan olah raga atau riadah.

Demikian menurut lima orang guru silat yang menerima diploma dari Penasihat Persekutuan Silat Singapura (Persisi), Haji Ya'acob Mohamed, malam kelmarin di Hotel Paramount.

## Riadah

Encik Suib Selamat dari kumpulan Setia Hati, yang belajar silat sejak 1948, menyatakan ketika itu seni tersebut adalah penting sebagai seni mempertahankan diri.

"Pada waktu itu kumpulan-kumpulan kongsi gelap atau samseng kerap bergaduh antara satu sama yang lain, jadi untuk menjaga keselamatan diri dari serangan yang tidak diingini itu, saya belajar silat.

"Pada mulanya kami belajar dan berlatih di tanah-tanah lapang. Tetapi kini ia telah berkembang menjadi sejenis kegiatan riadah," kata



ENCIK HOSNI

Encik Suib, yang menjadi jurulatih di beberapa buah balai rakyat.

Encik Suib, berumur 55 tahun dan bekerja sebagai penjaga keselamatan, menambah bahawa seni silat itu merupakan gabungan dari beberapa jenis antaranya ialah Sikalong, Chiroda, Chimanja, Dermayon, Hujung Semi dan Chimacan.

Encik Budin Seon dari Perguruan Silat Cekak, menyatakan sebagai kegiatan olah raga ia mempunyai beberapa had tertentu, antaranya, para peserta tidak boleh memukul sebarang.



ENCIK SUNI

Beliau belajar seni itu sejak berumur 8 tahun dan kini dalam usia 55 tahun, masih mengajar di sebuah balai rakyat dan sekolah menengah.

Seorang lagi guru yang menerima diploma ialah Encik Suni Rabi dari Silat Seni Pokolan. Beliau belajar seni itu dari keluarganya sejak berumur 7 tahun.

Berumur 65 tahun, Encik Suni menyatakan seni silat mengajar seseorang bergerak pantas dengan menggunakan tangan, badan dan otak.

Encik Suni, yang telah bersara, masih bergiat mengajar silat di beberapa buah balai rakyat.

Encik Buang Bahar pula dari Perguruan Silat Seni Gayung, berminat belajar seni itu sebagai mengembangkan warisan datuk/nenek kita.

Seni silat gayung atau gelanggang banyak menggunakan tangan untuk memukul dan mempunyai persamaan dengan karate dan twe-kwan-do.

Bekerja sebagai mandur di Lembaga Perumahan dan Pembangunan (HDB), Encik Buang menyatakan seni silat bukan saja merupakan olah raga, malah ia juga mendidik anak-anak muda tentang ahlak yang baik.

## Popular

Encik Hosni Ahmad dari Perguruan Alhak dan bergiat sejak 40 tahun lalu, menyatakan seni silat pada masa lalu sangat popular dalam majlis-majlis persandingan dan kumpulan-kumpulan sentiasa mengadakan majlis silat.

Tetapi, ia kini menjadi olah raga yang melatih para peserta cara-cara menggunakan kecerdasan otak dan kecergasan fizikal.

Sementara itu, Encik A Rahim Dayan, Timbalan Presiden Persisi, menyatakan inilah kali pertama mereka menyampaikan diploma-diploma kepada guru-guru silat.

Ia bertujuan mengenang jasa-jasa mereka yang telah banyak memberi khidmat dalam bidang itu dalam usaha mengembangkan serta memajukan silat sama ada sebagai olah raga atau kesenian.

20 JAN 1984